

Efesios

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, quem tsbuanácha sěntsabiamná Efeso puebloca Běngbe Bětsabe entšanga y Cristo Jesúsbeñe ošbuáchiyěnga imomněngbiama. ² Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tšěngaftangbeñe tšabe bendicioněnga chaotsemnama, y chata chaboma tšěngaftangbe ainaniñe tšabe ebionana chašmotsebonnama.

Crísoftaca cányiñe mo canyáca jtsemněse, běnga mochántsebonna nyetsca tšabe soyěnga, ntšamo celoca yobinyncá

³ Běngbe Bětsá y Běngbe Utabná Jesucristbe Taitábioye mochjětschuaye, er běnga Crísoftaca cányiñe mo canyáca mondměnayeca, Běngbe Bětsá tojama běnga nyetsca tšabe soyěnga chamotsebonnama, ntšamo celoca yobinyncá. ⁴ Běngbe Bětsá běnga šojanabacacá Crísoftaca cányiñe mo canyáca chamotsemnama, cabá quem luare cha ndama orscana, běnga chabe delante chamotsemnama chabe entšanga, bacna soyěngama perdonáněnga y chabe oservéněnga, y běnga ainaniñe bacna soye ndbomněnga imomna ca cha cháuyanama. ⁵ Běngbe Bětsá šuababuánjěshanayeca, tempo cha tojanjuabó y tojánbošena běnga mo cachabe basengcá jábiamama, chě Jesucristo

yochjanma sóyeca. ⁶ Chíyeca bēnga Bēngbe Bētsábioye sempre jtsatschuanayana, cha bēngbe tšabiana juabna yobómnayeca, ndayá chabe Bonshana Uaquiñáftaca bēngbe tšabiana cha tojamama. ⁷ Bēngbe Bētsá puerte bonshanánaca bēngbe tšabiana bētsá yajuabnáyeca, cha bēngbe bacna soyēngama šojtsaperdoná y šojatsebacá, er Jesús bēngbiana tojanóbana, chabe buiñe juabuáshanēse. ⁸ Bēngbe Bētsá tojama bēnga n̄yets osertánana y becá juabna chamotsebomnama, cha becá bonshanánaca bēngbe tšabiana juabna yobómnayeca, ⁹ y tojama bēnga chamotsetatšēmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjanin̄yan̄yé. Ndayá jamama Bēngbe Bētsá tempo yojanjuabnacá, ndayá cha tojama bēnga chamotsetatšēmbuama, cachá yojanjuabná chca jamama. ¹⁰ Ndayá jamama Bēngbe Bētsá yajuabnacá, lempe echanjochnēngo n̄ya chama tempo chaojóshjango ora, y quem Bēngbe Bētsabe juabna endmēna jamana, lempe ntšamo cha tojamcá celoca y quem luarentše, Cristo chamotsebomna n̄yetsca chē soyēnguiñe mo chē mandayacá.

¹¹ Bēngbe Bētsá sempre jamana n̄yetsca soyēnga ntšamo tojtsejuabnacá y tojtsebošcá. Y Bēngbe Bētsá bēnga šojabacacá, ntšamo cabá chca ndama ora yojanjuabnacá; chca, bēnga Cristoftaca cán̄yiñe mo can̄yacá jtsemnēse, bēnga chamóyēngacñama ndayá Bēngbe Bētsá chabe entšanga jatsatayama tojašebuachená, mo chēngbe otocana soycá.

12 Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inÿe entšanga Bëngbe Bëtsabe obenanama cha chamotsatschuanama. 13 Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cánÿiñe mo canÿacá chašmotsemnana y tcmojanainÿnaná tšëngaftanga chabe entšanga bétsemnana. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo cha tojanašebuachenacá. 14 Bënga chë Uámana Espíritu bëngbe ainaniñe mondbómnyayeca, corente mondétatšëmbo ndayá Bëngbe Bëtsá chabe entšanga tojašebuachenacá bënga mochjójëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nÿetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiana inétsamama, nÿetscanga cha mochántsatschuanaye, cha bëtsá y obená bétsemnana.

Pablo Bëngbe Bëtsábioye tbojanimpadá, ošbuáchiyënga osertánana chamotsebomnana.

15-16 Chcáyeca, atšna, Bëngbe Bëtsá tšëngaftangbiana stseimpadana ora, sempre cha sëndbétsatschuanaye, er atše sënjátatšëmbona ntšamo tšëngaftanga Bëngbe Utabná Jesúsbeñe

tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuánÿeshanama. ¹⁷ Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacméjabuachama, corente osertánënga chašmotsemnama, y chacminÿanyé nda Bëngbe Bëtsá yomnana, chca, más tšabá cha chašmotsábuatmama. ¹⁸ Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebomnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetátšëmbo tša bëtscá y bëts soyënga yomna ndayá chabe entšanga cha tojašebuachenacá; ¹⁹ y chašmotsetátšëmbo tša bëts soye y ndocna te ntjëftsopochócama chabe obenana yomnama, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerta bëts obenana endmëna, ²⁰ ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama. ²¹ Choca Cristo nyetsca soyënguiñe yojtsemánda, y más bëtscá obenana y mando yojtsebomna nyetsca mándayëngbiana, chë mando y obenana bomnëngbiana, y cha yomna más uamaná y bëtsá nyetsca chë entšangbiana mo bëtsëtsangcá utabnëngbiana, chëngbe uabaina respétoca

jtsichámese. Cristo puerte bĕtsá endmĕna lempe ntšamo quem luarentse yobínĕnama y Cristo yochjĕsabentsana yochtsebinĕnámna. ²² Bĕngbe Bĕtsá tojama Cristo nĕyetsca soyĕnguiĕne chaotsemándama, y tbojanábuayana nĕyetsca soyĕnguiĕne chaotsemándama, chábeĕne ošbuáchiyĕngbe tšabiamama. ²³ Cha endmĕna nĕyetsca chábeĕne ošbuáchiyĕngbe mandayá, y chĕnga mondmĕna mo cachabe cuerpo cuaftsemncá. Chĕngbe ainaniĕne cha endoyena y nĕyetsca luarĕnguíĕnnaca, y lempe cha endĕmánda.

2

Atsebácanĕnga mondmĕna, Bĕngbe Bĕtsá šuababuánĕshanayeca

¹ Tempo tšĕngaftanga Bĕngbe Bĕtsabiamama mo obanĕngcá šmonjamna, er tšĕngaftanga šmonjanijena, ntšamo Bĕngbe Bĕtsá yomandacá ntsamcá, y bĕtscá bacna soyĕnga šmojánama. ² Chca, tšĕngaftanga šmonjánama mo chĕ nĕye quem luarama enójuabnayĕnga monduamancá, y šmonjanĕyeunana Satanás, chĕ bacna espíritĕnga obenana bomnĕnga y quem luarentša tsbanánoca imomnĕngbe amĕndayá, chĕ Bĕngbe Bĕtsábioye ndĕyeunanĕngbe ainaniĕne yománda espírítu. ³ Tempo bĕnga nĕyetscanga fsĕnjaniyena ntšamo tšĕngaftanga šmonjanijencá. Bĕnga soyĕnga fsĕnjánama, nĕye ntšamo ftsjanbošcá nĕye bĕngbe cuerpĕngbe tšabiamama, y nĕye ntšamo bĕngbe juabna enjamncá bacna soyĕnga jamama. Bĕnga fsĕnjaniyena soyĕnga jtsamĕse mo chĕ Bĕngbe Bĕtsábioye nduabuatma entšanga mondbetsamcá;

chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá. ⁴ Pero Bëngbe Bëtsá sempre tša lastemado entsangbiana endmëna y siempre corente bënga šondábabuanÿeshana; ⁵ y chíyeca, bënga cabá mo obanëngcá chabiana fsënjamna ora, bacna soyënga fsënjánama causa, chora cha tojanma bënga tšabe vida chamotsebomnama y Crísoftaca cánÿiñe mo canÿacá chamotsemnama. Bëngbe Bëtsá tšëngaftangbe tšabiana juabna bómnayeca, bacna soyënguentsana tcmojatsebacá. ⁶ Bënga Jesucrísoftaca cánÿiñe mo canÿacá bëtsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá. ⁷ Chca enjamna, Bëngbe Bëtsá entsanga cháuinÿanÿema nÿetsca joshjanguama tempënguiñe, ntšamo cha bëngbe tšabiana bëtscá juabna bëtsebomnama, cha Cristo Jesúseftaca bëngbioye tšabe juábnaca šojánanÿe ora. ⁸ Er Bëngbe Bëtsá tšëngaftangbiana tšabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canÿe tšetana soye. ⁹ Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnama. ¹⁰ Bëngbe Bëtsá šojtabiana ntšamo

bënga mondmëncá, y Cristo Jesúseftaca cánÿiñe mo canÿacá bétsemnayeca, Bëngbe Bëtsá mo tsmëma entšangcá cuaftsatsmëncá šojtabiama, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

Crístbeyeca tempcá tšabá Bëngbe Bëtsáftaca jtsatsmënana

¹¹ Tšëngaftanga ndoñe judiënga, ndëmuanÿenga judiënga cmondubuatma “chë más delicadentše base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtsenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga, ¹² šmochjenójuaboje ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiama stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmcá. ¹³ Pero mora tšëngaftanga Cristo Jesúseftaca cánÿiñe mo canÿacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiama tojanóbana. ¹⁴ Cach Cristo yojtsama bënga tempcá tšabá Bëngbe Bëtsáftaca chamotsemnama. Cha tojama judiënga y

ndoñe judiënga nÿetscanga mo cachca entsangcá chamotsemnama, mo nda canÿe tapiëse tojtsendbemcá, chë ndayëšeca canÿe luarentša entsanga tmojtsenjáta, chënga enáyaye causa. ¹⁵ Cristo chënga mo cachca entsangcá tojábiama, judiëngbe leyënga y mandënga ndocna obenana chamondëtsebomnama jamëse. Chca tojama, cha jóbanëse, chë útoica entsanga mo nÿe canÿe tsmëma entsangcá jábiamama, cháftaca cánÿiñe mo canÿacá jtsemnëse. Cha chca tojanma chënga nÿetscanga tšabá chamotsiyenama; ¹⁶ y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canÿe entsangcá chamotsemnama, chënga tempcá tšabá Bëngbe Bëtsáftaca chamotsatsmënama.

¹⁷ Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. ¹⁸ Er chábeyeca, canÿánÿenga y ínÿenga montsobena chë Taitábioye jobéconana, er bënga nÿetscanga cachca espíritu bëngbe ainaniñe mondbomna, chë Uámana Espíritu. ¹⁹ Chíyeca tšëngaftanga, Bëngbe Bëtsabe entsanguentše ndoñe quešmátsmëna mo inÿe luarocana ashjajnëngcá, y ni mo cachëngbe yebnentše ndoyenëngcá, todayama derecho ndbomnënga. Inÿetšá endmëna; tšëngaftanga derecho šmondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe

básenga šmondmëna. ²⁰ Jesucristo y chabe entšanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayiñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá. ²¹ Quem más uámana luarentše uashacuana ndëtsbeñe, nÿetsca chë bëts yebnentša soyënga jtsëcuatjonana, y tsbanánoye más tmojtsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nÿetsca chábeñe ošbuáchiyënga cháftaca cánÿiñe mo canÿacá chamotsemnana, y inÿëngnaca cachcá chamotsemnana. Y nÿetsca ošbuáchiyënga Crísoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiana canÿe bëts yebna jebncá, chábioye jtsatschuanayama. ²² Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canÿe entšangcá chašmotsemnana. Y chë Uámana Espíritu bëngbe ainaniñe yojtsiyénayeca, bënga nÿetscanga cánÿiñe mondmëna, mo canÿe bëts yebncá ndayentše Bëngbe Bëtsá yoyena.

3

Pablo Jesucristbe trabajo yojanbonÿena, chë ndoñe judiëngbeñe jamama

¹ Chca, atše Pablo utamená sëntsemna, Cristo Jesusbiana soyënga entšanga abuayiynaye

causa, tšëngaftanga chë ndoñe judiëngbe tšabiamama. ² Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiamama juabna yobomnama; y chca, chë trabajo atše šojabonyé, tšëngaftangbe tšabiamama jamama. ³ Tšëngaftángnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanÿé, y chë soyama ya batšatema tcbonjubuábiamama. ⁴ Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanÿé, Jesucristbe ichmónënga nÿe Bëngbe Bëtsabiamama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. ⁶ Ndayá tempo Bëngbe Bëtsá ndoñe tonjaninÿanÿecá mëntsá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábíocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuáchiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nÿetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca,

chënga Cristo Jesúseftaca cányiñe mo canyácá bétsemnayeca.

⁷ Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama, tšabe noticiënga entšanga jtsabuayiynayëse; y cha átšeftaca chca tojanma chabe obenánaca. ⁸ Atše nyetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëts cá tšabe soyënga chë ndoñe judiënga jábuayenama. Chë Cristbe soyënga tša bëts cá endmëna, y chca, quenátopodena chë soyënguentsana lempe jtsabuátmana. ⁹ Y chë trabajo šonjabonyé jamama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Mëntscoñama Bëngbe Bëtsá chë soye ndocnábioye tbonjinýinýé, pero mora aíñe. ¹⁰ Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrísoftaca, Bëngbe Utabná. ¹² Bënga Crísoftaca cányiñe mo canyácá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatj cá, y corente jtsetatšëmbëse cha ndoñe chašondubatema. ¹³ Chýyeca atše cbontsaimpadana ndoñe chašmondëtsajbaná ainaniñe añemo bomnana, atše sëntsesufrina

causa, er chë tšëngaftangbe tšabiama tsësufrinentšana, tšëngaftangbiana tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshaméntšase, ¹⁶ sëntseimpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebonnama, chabe Espíritbeyeca, ¹⁷ y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca sëntseimpadana, cha y ínÿenga nyets ainánaca jtsababuánÿeshanëse, ¹⁸ tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Crístbe bonshánana bëngbiana tša bëtscá yomnama. Nderado nda tojontšé chabe bonshánana jatšëmbonana mo canÿe soye cuaftsemncá, cha ndocna te nanjobenaye jtsetatšëmbuana tëntsoye ndayëntscoca yomna y nÿanëjoye ndayëntscoca, jashenoye ndayëntscõe y tšbanánoye ndayëntscõe yomna. ¹⁹ Atše sëntseimpadana tšëngaftanga chašmobená chë bonshánana juabuátmanana (chë bonshánana puerte bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tšëngaftangbe ainaniñe nÿe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo

tšëngaftanga chašmotsamama Bëngbe Bëtsá yojuabnacá.

²⁰ Y mora, nÿetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebomnama. ²¹ ¡Entšanga Bëngbe Bëtsá chamotsatschuaná nÿets tempo y nÿetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

4

Uámana Espíritbeyeca bënga cánÿiñe mo canÿacá jtsemnana

¹ As, atše chë cárceloye utamená, Bëngbe Utabnabiamama trabájaye causa, tšëngaftanga cbontsaimpadana, ndëmuanyënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanyënga Bëngbe Bëtsá cach soyama tojánachembo y chca imomerecena. ² Cada ona chamotsenoyuabná mo chë ínÿenga chabiamama más uámanënga tmojtsemncá, y nÿetscángbioye puerte bonshanánaca šmochtsobátmana, y bëtscá bonshánana jtsebomnëse šmochtsenëuantana; ³ siempre šmochtsejuabnaye y šmochtsentšena tšëngaftanga nÿets tempo cánÿiñe mo canÿacá chašmotsemnana, nÿetsca tšëngaftanga natjëmbana jtsemnëse. Y tšëngaftanga šmotsobena cánÿiñe mo canÿacá jtsemnana

chë Uámana Espíritbeyeca. ⁴ Bënga Jesucristbeñe ošbuáchiyënga bétsemnayeca mondmëna mo cach cuerpentsëngcá, chë Cristbe cuerpo, y cachca Espíritu bënga nÿetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nÿetscanga cachcá šochjátšatayama chamotsobátmanama. ⁵ Bënga nÿetscanga cach Utabná mondbomna, cachca ošbuáchiyana Jesucristbeñe mondbomna, y bënga nÿetscanga uabáinënga mondmëna chca betsošbuáchiyama. ⁶ Bënga ošbuáchiyënga nÿetscangbiana cach Bëngbe Bëtsá y Taitá endmëna. Cha bëngbe amëndayá endmëna, chabe obenana nÿetscángbeñe jtsinÿnana, y nÿetsca bëngbe ainaniñe chabe Espíritu endmëna.

⁷ Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. ⁸ Chíyeca, Bëngbe Bëtsabe uabemana palabrënguiñe Jesucristbiana mëntšá endayana:

Cha celoye tontantsjuá, y cháftaca tonjanéyamba nÿetsca chabe uayayënga, chë tojánayënjananga,
y chabe entšángbioye obenana tonjanatsatá, tšabe soyënga jamama ca.

⁹ ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰ Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canÿe ora nÿétscañe cha chaotsemnama. ¹¹ Y cachá, chë tšabe soyënga

jamama obenana tojanatšatá ora, tojanma chábeñe ošbuáchiyenguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuyiynayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. ¹² Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, ¹³ bënga nÿetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiama nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsetsanga bëtscá juabna bomnëngcá, ¹⁴ y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿenga paselo jáingñama yomna. Mo canÿe barquëshá nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatuencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuena tsëm sóyeca, ínÿengbioye áingñayënga. Chënga becá montsetatšëmbo ntšamo entšanga jáingñana, y montseboše chë montsabatambá bostero soyënga bënga jtseyeunanama. ¹⁵ Chamna, chë Bëngbe

Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. ¹⁶ Mo canýe bestšašcá, chëse jamana nyetsca chë cuerpentša soyënga ndayentše chamueneffnama y chiñe jobónjuama chamotsobenama, chë cuerpo saná chaotsebomnama jtsamëse, chca, nyets cuerpo tšabá chaóbochema, cachcá Cristo, chë nyetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

Crísoftaca cánýiñe mo canýacá jtsemnëse tsëm vida šmochtsebomna

¹⁷ Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. ¹⁸ Chëngbe juabnoca obenana mondbomna nýe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábiocana yóbocana tšabe vida, er

chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. ¹⁹ Chënga bacna soyënga tmojtsama ora, tondayama ntsenócochinÿenana; chënga nÿets tempo jesentsénana nÿetsca bacna soyënga amana, y chca jtsamana tondayama ntjatenojuabnycá.

²⁰ Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá. ²¹ Ndegombre tšëngaftanga chabiamana šmojanuena y ínÿenga tcmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá. ²² Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canÿe ondbiamnaye juabnentšana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye. ²³ Tšëngaftanga cmontsamna tšëngaftangbe juabniñe tsëm y tšabe juabnënga jtsebomnana. ²⁴ Tšëngaftanga cmontsamna jashjáchana mo tsmëma entsangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca

tsmëma entsangcá tcmojábíama, tsëngaftanga chašmotsiyenama jtsamëse Bëngbe Bëtsabe bominyiñe tsabá yomna soyënga y chábioye jadórama soyënga, chë ndegombre soyënguentšana óbocana soyënga.

²⁵ Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cányiñe mondmëna mo nye canye entsangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nyets te chacmondetëna. ²⁷ Ndoñe šmatjaleséncia Satanás ndayánaca tsëngaftangaftaca chaomama.

²⁸ Chë yojanatbëbaná chauajbaná atbëbanama y jatrabájama chaontsé; cachabe cucuátšeca tsabe trabajo chaotsóboma, chca, ndayánaca cha chaotse-bomnama chë ujabótënga jatšatayama.

²⁹ Bacna palabrënga ndoñe šmattsichamo, pero aíñe tsabe palabrënga y nya chorsca ujabótama palabrënga, chë inye entsángbioye jujabuáchama más Cristcá chamotsemnama, chënga Bëngbe Bëtsábiocana tsabe bendicionënga chamóyëngacñama, chë ndayá chašmojtsëtsëtná sóyeca. ³⁰ Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tsëngaftangbe ainaniñe cháumashënguama, y chca, tcmojanainñaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nyetsca tescama yochjatsebacaye orscama.

31 Inyengbiamana bacna juabnenga ainaniñe ndoñe chašmondětsebmna, etonánenga ndoñe chašmondětsemna, ni inyengaftaca ndoñe chacmondetëna. Inyengbioye ndoñe chašmondětsabuachembuana, inyengbioye ndoñe šmatjoyánguango y ndaye bacna sóynaca ndoñe šmattsama. 32 Nyetscángaftaca tšábenga šmochtsemna, nyetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

5

Ntšamo yomna Bëngbe Bëtsabe básenga chamot-siyenama

1 Tšëngaftanga, Bëngbe Bëtsabe bonshana básenga quetsomñecá, nya šmochtsentšena cachacá jtsemnama. 2 Smochtsiyena nyetsca soyënga bonshanánaca jtsamëse, ntšamo Cristo šojanababuanyëshancá; chca, cha chabe derecho vida jtsobomñama cachcá tojanonýa y bëngbiamana tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe bominyiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóba y altaroca tcojajuinýese, y chë soye botamana jtsonguëtsiyana.

3 Tšëngaftanga, Bëngbe Bëtsábenga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayana y jtsebošana, y chë nye yapa jésebošana más soyënga inyengbiamana jtsebomnama cach ndoñe. Ni chë soyëngama

ndoñe šmattsóyebuambnaye. ⁴ Bacna soye ndoñe šmattsóyebuambnaye, ni corente ntjenouaboycá, ni nýe ntšámnaca bacna soye jenbotatšëmbonana cach ndoñe, er chë soyënga tšëngaftangbiana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. ⁵ Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nýe chabe bacna juabnëngaca soyënga jtsamama oyená, o chë nýe más soyënga ínýëngbiana jtsebomnama bošá y amá (chca jtsayanana chabiana más iuámana soyënga jtsebomnana, Bëngbe Bëtsábioye jatsbobonshánama), chca amënguentsana ndocná tondaye queochatóyëngacñe ndayá Bëngbe Bëtsá chabe entšángbioye jatšatayama tojašebuachenantsana, Cristo y Bëngbe Bëtsabe amëndayoca. ⁶ Ndocná chacmondaingñé ndoñe ndegombre tondmëna palabrëngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. ⁷ Chíyeca, chca amëngbe soyënga tondaye šmattsama.

⁸ Tempo tšëngaftanga šmojaniyena bacna juabnënga jtsebomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánýiñe mo canýacá bëtsemnayeca, chabe soyënga šmontsetátšëmbo y sempre šmondétsemna cháftaca, chë entšangbe juabnënga binýnáyáftaca. Smochtsiyena jtsamëse mo chë binýnáyabe entšangcá.

⁹ Chë binýnáyábeyeca entšanga tšabe soyënga

jtsamana, chë Bëngbe Bëtsabe bominiñe tsabá yomna soyënga, y ndegombre soyëngnaca.

¹⁰ Nÿa šmochtsentšena soyënga jamama, Bëngbe Bëtsá oyejuayá chaotsemnama.

¹¹ Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbioye šmochjínÿanÿiye chënga ndoñe tsabá tmonjamama. ¹² Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja; ¹³ pero nÿetsca soyënga binÿniñe tmojacjá ora jtsopodénana tsabá jinÿama ntšamo ndegombre tomncá. Cachcá, ntšamo entsanga tmojamcá chë binÿnayá chaojinÿanÿé ora, echantsopodena jtsotatsšëmbuama ntšamo chë soyënga yomnana; ¹⁴ er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entsanga iytëmencá tmojtsamcá chë binÿnayá chaojinÿanÿé ora, chënga mochántsetatsšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá;

chë bacna soyënga ama causa, Bëngbe Bëtsabe bominiñe mo obanëngcá imomnënguentsana šmochtsojuánañe,

y Cristo acbe juabnënga echantsebínÿnaye ca.

¹⁵ Chcasna, šmochtsantješna ntšamo tsabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aiñe chë chca

soyëngama osertanëngcá. ¹⁶ Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama. ¹⁷ Ntjenuabuoycá ndoñe šmattsama, mo chë ndosertanëngcá. Pero aínne bëtscá šmochtsentšena ndayá Bëngbe Utabná jamama yobošcá chacmósertama. ¹⁸ Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama. ¹⁹ Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiamá šmochjacántaye y cha šmochtsatschuanaye. ²⁰ Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canÿe yebnentšënga chamotsem-
nama*

²¹ Nÿetscanga šmochtsenëyeunana, tšëngaftanga Crístbioye puerte šmorrespetánayeca.

²² Shémanga, šmochtsetátšëmbo tšëngaftangbe boyanga chë yebnentša mándayënga imomnama; y nÿets tempo chca šmochtsama, Bëngbe Utabná chašmotsobedecénama. ²³ Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora

cha chënga entsamënda, mo chë bestšaše nyets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnama imotatsšëmbcá y chca jtsamana, cachcá, chë shemágnaca entsamna jtsemnana nyetsca soyënguiñe chëngbe boyángaftaca.

²⁵ Boyanga, tšëngaftangbe shémanga šmochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiana tojanóbana. ²⁶ Chca tojanma, chënga chabe entsanga y puerta tšábenga jábiamama; y chënga tmojánenabaye ora, tmojaninÿanÿé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnama cha tojanmama. Cha chca tojanma, er chënga chábeñe imojtsanošbuaché, chabiana buayenana soyënga tmojanuena ora.

²⁷ Cha chca lempe tojanma, chë ošbuáchiyënga japróntayama corente tšábenga y uámanënga cachabiana chamotsemnama, ndocna bacna soye ndbomnënga, ni ndocna entsá chaondobená jayanama chënga imomna chë ndoñe tšabá tmonjamënga ca, ni ndocna inÿe cachca sóyeca. ²⁸ Ntšamo canÿe boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsenobobonshánana, er chata cánÿiñe jtsemnana mo nÿe canÿe entsá cuenta. ²⁹ Er ndocná cachabe cuerpo jtsáboyënjana, ndayá saná janguangoñana y jtsinÿenana, ntšamo Cristo bënga chë ošbuáchiyëngaftaca endbetsamcá; ³⁰ er bënga

nÿetscanga cánÿiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. ³¹ Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canÿacá bochantsemna ca.” ³² Chë soyënga josértama puerta totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. ³³ Pero morna, tšëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

6

¹ Básenga, Bëngbe Utabnáftaca cánÿiñe mo canÿacá bëtsemnayeca, tšëngaftangbe bëtsëtsangbioye šmochtsayaunana, er chca jamana tšabá endmëna. ² Moisesbe leyíñe canÿe mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjëttsaquédaye, ³ tšabe vida chacuetsobomñama y quem luarentše bayté chacuetsiyenama.”

⁴ Taitanga, ndoñe šmattsama tšëngaftangbe básenga chauetënama; más tšabana, chënga šmochtsabëchaye jtsabuátambayëse y jucácanëse, ntšamo Bëngbe Utabná endbetsabuatambaycá.

⁵ Tšëngaftanga, chë nÿets tempo nÿe ínÿabiama oservénënga, tšëngaftangbe nduiñënga šmochtsayaunana; chca šmochtsama puerta

respétoca, bëtská cuedádoca y nyets ainaniñe tšabe juabnëngaca, mo cach Crístbioye cuaftseservencá.

⁶ Y chca chë nduiñëngbioye šmochtsaservena, ndoñe nyë chënga chacmojtsënÿa ora, mo nda nyë entsangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá.

⁷ Nyetsca trabajotémënga šmochtsama nyets tšëngaftangbe añëmoca, mo Bëngbe Utabnabiamá cuaftsetrabajacá, y ndoñe nyë entsangbiamá. ⁸ Er tšëngaftanga ya šmondëtatšëmbo, cada ona, nyets tempo nyë ínÿabiamá trabajayá o nyë cachabiamá trabajayá tomna, ntšamo tšabe soyënga tojamcá Bëngbe Utabnábocana yochjójyëngacñe.

⁹ Y tšëngaftanga, ndëmuanÿëngbiamá ínÿënga nyets tempo imoservena, cachcá tšabá chëngaftaca šmochjamna, tondayama ntsaútatjnayëse. Smochtsenójuabnaye, Bëngbe Utabná chë celoca endméná, tšëngaftanga y chëngbe mandayá yomnama, y chabiamá nyetscanga cachcá monduámána.

Ndayá Bëngbe Bëtsá entsanga tojatšatá Satanabiamá jenëuyanama

¹⁰ Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añëmo šmochtsebomna, chë Bëngbe Utabnabe bëts obenanentsana óbocana añëmo. ¹¹ Mo canÿe soldadcá, ba soyënga jtochëtjuana chë tmojtsentsjananga ora uayayëngbiamá jenëuyanama, tšëngaftángnaca cachcá, nyetsca chë Bëngbe Bëtsá cmojatšatá soyëngaca šmochtseprontana jenëuyanama, tšëngaftanga

jáingñama Satanás ntšámnaca tojtsama ora, ndoñe chacmondáyenjanama. ¹² Er bēnga ndoñe quemuatenojuerzana cach quem luarentša entšángaftaca jenēyēnjanama, ndayá bacna espíritēnga mando bomnēngaftaca; bacna espíritēnga obenana bomnēngaftaca; y quem luarentša entšanga, chē bacna juabna bomna causa y Bēngbe Bētsabe soyēnga nduabuatma causa, mo ibetiñe cuaftsoyencá oyena entšángbioye amēndaye espíritēngaftaca; y chē tsbanánoca luarēnguiñe imomna y bacna soyēnga chaotsebínynama ama espíritēngaftácnaca. ¹³ Chíyeca, lempe ntšamo Bēngbe Bētsá cmojatsatacá šmochjójēngacñe y chē soyēnga jtsamēse šmochtsiyena jtseprontánama, mo canye soldado jenēuyanama y jáyēnjanama bētscá soyēnga tojtochētjácá. Chca šmochjama, chē uayayá Satanás tšēngaftangbioye jáingñama chaojtsama ora ndoñe chacmondáyēnjanama, y jenēuyanama lempe jtsamēse, chašmobená cha jayēnjanama.

¹⁴ Mo canye soldadká, jabuache jtasnayana y cochaca canye morocho soye jenácochjatsana jtsevalentiamana y ndoñe chamondēyēnjanama, tšēngaftángnaca cachcá, ntšamo ndegombre yomncá jtsamēse šmochtsiyena, mo chē jabuache cuaftasnacá, y chē Bēngbe Bētsabe bominiñe tšabá yomna soyēnga jtsamēse, mo chē morocho soye cochaca cuaftenacochjatscá, chca, Satanás tšēngaftangaftaca tondaye chaondobená jamama. ¹⁵ Mo canye soldadká jtoshēcōhētjuana betscō jobónjuama jtseprontánama, tšēngaftángnaca cachcá, Bēngbe Bētsabe obenánaca sempre

šmochtseprontana jtsabuayiynayama ntšamo Bëngbe Bëtsá inétsama entsanga tempcá tšabá cháftaca chamotsatsmënana. ¹⁶ Canÿe soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadcá, canÿe morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjësejuabnaye Bëngbe Bëtsá cmojátsebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadcá, chë uayayábioye jayënjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámana Espíritu jtsamana, tšëngaftanga Bëngbe Bëtsabe palabra chašmotsebomnana. ¹⁸ Nÿets tempo chë Uámana Espíritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiama nÿetscangbiama cha šmochtseimpadana.

šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauatjca jóyebuambayana, y chca, entšanga chayinÿanÿé Jesucristbiamama tšabe noticienga, ndayá chënga tempo ndoñe monjántatsëmbo. ²⁰ Bëngbe Bëtsá šojichmó mo canÿa chabe cuenta oyebuambnayacá, chë buayenánama entšángbeñe jóyebuambayama, y chca bétsamama, mora atše utamená séntsemna. Atšbiamama Bëngbe Bëtsá šmochtseimpadana, atše chayobenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

Pablo chënga jtadiósoftanama

²¹ Tíquico, Jesucristbeyeca bëngbe bonshana catšata y canÿe entšá tšabe palabra bomná, Bëngbe Utabnabe trabajo jamama oservéniñe, ntšamo atše stsemnama y ndayá stsamama tšëngaftanga chašmotsetatsëmbuama, lempe cmochanjácuntaye.

²² Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnama chaomama.

²³ Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebomnama, y Bëngbe Bëtsábioye y ínÿengbioye puerta chašmotsababuánÿeshanama, Jesucristbeñe tšëngaftangbe ošbuachiyánaca; ²⁴ y chaboma, chë Bëngbe Utabná Jesucristbioye bëts bonshanánaca imobobonshanëngbeñe tšabe bendicionënga

chaotsemnama, canÿe ndocná yondobena
jatrócama bonshanánaca.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9